

Na osnovu čl. 3. i 5. Zakona o prenosu poslova medijacije na udruženje medijatora (Službeni glasnik BiH broj 52/05), u vezi sa članom 4. Zakona o postupku medijacije (Službeni glasnik Bosne i Hercegovine br. 37/04), te na osnovu člana 20. Statuta, Upravni odbor Udruženja medijatora u Bosni i Hercegovini donosi

PRAVILNIK O UPUĆIVANJU NA MEDIJACIJU

Član 1.

Ovim Pravilnikom propisuje se postupak upućivanja predmeta na medijaciju.

Član 2.

Strane u sporu mogu se sporazumjeti prije i nakon pokretanja sudskog postupka da spor riješe u postupku medijacije.

Ako je pokrenut sudski postupak, sudija koji vodi postupak na pripremnom ročištu može predložiti strankama, ako ocijeni da je to svrsishodno, da spor pokušaju riješiti u postupku medijacije.

Član 3.

U slučaju iz člana 2. ovog Pravilnika stranke u sporu podnose pismeni zahtjev administrativnoj službi Udruženja medijatora u BiH (u daljem tekstu Udruženje), na obrascu koji propisuje Udruženje.

Član 4.

Ako u zahtjevu stranke nisu usaglasile izbor medijatora ili ako nisu na Udruženje prenijele ovlaštenje za izbor medijatora, administrativna služba Udruženja će po prijemu zahtjeva dostaviti strankama listu medijatora.

Član 5.

Svaka od strana će na tako dobivenom spisku označiti imena medijatora, rangirajući ih prema redoslijedu preferencije i spisak dostaviti Udruženju u roku od pet dana.

Udruženje će na osnovu iskazanih preferencija stranaka imenovati medijatore i o tome obavijestiti stranke.

Član 6.

Udruženje koordinira između stranaka i medijatora u vezi sa najpogodnijim datumom i mjestom održavanja medijacije.

Medijacija će se u pravilu održavati u prostorijama Udruženja.

Na zahtjev stranaka medijacija se može održati i na mjestu koje one odrede, uz obavezu plaćanja dodatnih troškova.

Prije održavanja medijacije Udruženje će strankama dostaviti ugovor o medijaciji i depozitnu fakturu koju su stranke dužne izmiriti prije početka postupka.

Postupak medijacije može inicirati jedna od strana u sporu ili treće zainteresovano fizičko ili pravno lice podnošenjem zahtjeva Udruženju.

Zahtjev iz prethodnog stava treba da sadrži: ime i prezime, adresu i brojeve telefona, faksa i e-mail adresu podnosioca zahtjeva i stranaka u sporu i dokaz o plaćanju naknade uz zahtjev u iznosu koji propisuje Udruženje.

Član 7.

Povodom zahtjeva, Udruženje će kontaktirati stranu odnosno strane u sporu u ime podnosioca zahtjeva u cilju njihovog informisanja o postupku medijacije i pokušaja pribavljanja saglasnosti da se spor riješi u postupku medijacije.

Član 8.

Ako su stranke u sporu dale saglasnost da spor riješe u postupku medijacije, Udruženje će im dostaviti listu medijatora.

Član 9.

Dalji postupak u ovom slučaju će se provesti prema pravilima sadržanim u odredbama članova 5. i 6. ovog Pravilnika.

Član 10.

Ako nije pribavljena saglasnost stranaka da se spor riješi u postupku medijacije, Udruženje će o tome obavijestiti podnosioca zahtjeva.

Član 11.

Ovaj Pravilnik stupa na snagu narednog dana od dana objavljivanja u "Službenom glasniku BiH".

27.2.2006. god.
Banja Luka

Predsjednik Udruženja
Goran Salihović
